

勸發菩提心文
義

興慈題



興慈



勸發菩提心文講義

上海圓明講堂圓瑛弘悟講

侍座受度弟子明如日進記

今講此文。依照賢首宗十門解釋。略事發揮。(一)總釋題目。(二)撰文法師。(三)啓教因緣。(四)藏乘所攝。(五)教理淺深。(六)宗趣分別。(七)能詮教體。(八)所被機宜。(九)力用殊勝。(十)別解文義。今一總釋題目。

勸發菩提心文

題爲一文之總綱。文是一題之別義。欲知別義。須究總綱。總綱若明。別義自易。如提綱。則綱目自彰。挈領。則衣縷自直。是以首門。卽總釋題目。亦提綱挈領意也。

此題六字。應分通別二題。前五字是別題。他文非此題故。名之爲別。文之



一字。是通題。通於他種。故如龍舒淨土文。雲棲放生文等。皆可名文。別題。是所詮之法義。通題。是能詮之文字。文者義之表也。義者文之實也。文稱於義。義隨於文。文義相資。能所不離。合爲題目。

又應知此題。具含人法能所。按古德七種立題。以人法喻三字。單三種（是一字）單人如佛說阿彌陀經。單法如大般涅槃經。單喻如大寶積經。復三種（是二字）人法如文殊問般若經。人喻如如來說師子吼經。法喻如妙法蓮華經。具足一種（具三字）如大方廣法佛人華嚴喻經。本題明是單法立題。以菩提心是性法。乃衆生自性本具之法。勸發二字。是修法。既經勸發。必依菩提心而起菩提行。修諸行門。求證菩提之道。題中明文無有人喻字面。故曰明是單法立題。

若以義推。實含人法能所。既有所勸發菩提心之法。必有能勸發菩提心之人。若無其人。誰爲勸發。當知勸發屬教。發心屬機。題具對機施教之意。

勸者。勸化。勸導。勸勉。○勸化。如云一切衆生。當發菩提心。方能出離生死。苦。○勸導。如云我等本來是佛。因爲無明所誤。而爲衆生。今當返迷歸悟。稱性起修。上求佛道。下度衆生。○勸勉。如云既發菩提心。須行菩薩道。必要經過三個難關。難行能行。難捨能捨。難忍能忍。菩提心須堅固不退。發者。發明。發起。發展。○發明。如聞勸之後。發明自性真心。卽是菩提心。廣大平等。一向迷而不覺。今承指示。開解明了。謂之發明。○發起。如既承勸明了。卽發起此菩提心。智慧並運。解行相應。躡解起行。謂之發起。○發展。如既發菩提心。而脩菩薩行。則六度齊脩。四攝普被。令未種善根者。種已種者增長。已增長者成熟。已成熟者解脫。念念上求佛道。心心下化衆生。謂之發展。

菩提心。卽是道心。梵語菩提。此翻爲道。菩提有三。一曰真性菩提。此以理爲道也。二曰實智菩提。此以智慧爲道也。三曰方便菩提。此以透機施教。

爲道也。○真性乃真如自性。聖凡同具。迷之爲凡。悟之成聖。迷悟雖殊。生佛一致。平等平等。楞嚴經云。大地草木。輒動含靈。本元真如。卽是如來成佛真體。依此不特生佛無異。實則情與無情。皆同一體。在有情分上。名之佛性。在無情分上。號曰法性。今約有情衆生。卽是人人本具之佛性。名曰本覺。亦卽如如理。真實不虛。無有變異。故曰真性菩提。以理爲道也。

實智。乃真實智慧。非同世間所有世智辯聰也。世智不離生死。實智能證菩提。卽稱如如理。所起之如如智。亦名始覺。依此始覺智。反照本覺理。照徹心源。真實了知。卽是根本智。及實智。故曰實智菩提。以智慧爲道也。

方便。乃權巧施設。先鑑衆生機宜。應以何身得度。則現何身。應以何法得度。則說何法。種種方便。化度衆生。卽從根本智所起之後得智。又名差別智。及權智。故曰方便菩提。對機施教爲道也。

菩提又譯爲覺。菩提心卽自覺覺他之心。若但自覺而不覺他。不名菩提。

心。故二乘之人。不發菩提心。惟大乘衆生。方能得發。經云。我今發心。不爲自求。人天福報。聲聞緣覺。惟依最上乘。發菩提心。

菩提心當云何發。須知菩提心者。從大悲起。菩薩修行。此心爲先。若不發大悲之心。一切萬行。無從建立。何爲大悲心。視大地衆生。皆爲一子。是也。子有飢寒疾病。爲父母者。必以悲心。而拔其苦。乃至不惜一切。而爲其子。如能視大地衆生之苦。如己一子之苦。而爲設法救拔。如是之心。名大悲心。

起信論三心。亦卽菩提心。一者直心。正念眞如法故。此念之所以爲正者。不着二邊。起智觀照眞如正理。卽契菩提心體。二者深心。樂修一切諸善行故。好樂修習。世出世間。自利利他諸善行。三者大悲心。欲拔一切衆生苦故。以平等大悲心。拔除一切衆生。分段變易二生死苦。此二皆發菩提心用。今勸發菩提心。卽勸發起信三心。令趣無上菩提也。

又菩提心。卽菩薩心也。楞嚴經云。自未得度。先度人者。菩薩發心。此心則捨己利他。大乘行願。非同聲聞緣覺。但求自利者。所可同日語也。又菩提心。卽進趣無上菩提之心也。此心能自覺覺他。乃至覺滿。得證阿耨多羅三藐三菩提。此心通因徹果。因中必發菩提心。果上方成菩提道。雖成菩提道。究竟不離菩提心。

文卽文言。名句文三身之一。名詮自性。如云瓶。非盆非碗也。句詮差別。如云花瓶。非油瓶酒瓶也。文詮聯綴。文義相聯絡。如云此花瓶。是古磁。經時既久。火氣脫盡。盛水養花。可以耐久。新鮮不謝。今此文。由積名成句。積句成文。能詮顯勸發菩提心之義理。令生解起行故。此文。雖非經非律非論。而經律論三藏之旨。文中皆具。能成法益。一總釋題目竟。

●二撰文法師

古杭梵天寺沙門寶賢撰



古杭卽今之杭州也。昔亦稱武林。梵天寺在鳳山門外。於有宋時代開山。明朝中興沙門。出家修道者之通稱也。梵語沙門。譯爲勤息。謂勤修戒定慧。息滅貪瞋癡。又謂識心達本源。故號爲沙門。

實賢是祖法諱。字思齊。號省庵。爲蓮宗第九祖。江蘇常熟縣。時氏子。爲書家後裔。祖生於清朝康熙二十五年八月初八日。生卽不苟葷。總角之年。卽有離塵志。父蚤逝。母張氏。十分賢明。知祖夙植善根。乘願再來。遂命出家。年七歲。禮清涼庵容選大師爲師。十五歲薙髮。二十四歲圓具。於昭慶戒壇。嚴淨毘尼。於道精進。常終夜不臥。尋入講筵。洞明性相二宗。從崇福靈鷲和尚。參念佛是誰。四閱月有省。曰我夢覺矣。由是機辯縱橫。善說法要。和尚欲付衣拂。弗受。遂禁足於眞寂寺。晝覽藏經。晚持佛號。於己亥春。詣明州阿育王寺。瞻禮舍利。佛之靈骨二月十五佛涅槃日。大合緇素。廣脩供養。併於塔前燃指。發四十八願。感舍利放光。衆皆共覩。作此勸發善

提心文。激勵四衆。誦者多爲涕下。感化者衆。祖平生住持永福。普慶。海雲。仙林。梵天。諸法席。化道崇隆。三根普被。雍正七年。結蓮社爲文誓衆。畢命爲期。己酉冬。主席梵天寺。屏絕諸緣。掩關寸香齋。雍正十一年。臘月八日。告衆曰。明年四月。吾去矣。由是日課佛名十萬。明年四月十二日。告衆曰。月朔以來。再見西方三聖。其將往生乎。卽書偈云。身在華中佛現前。佛光來照紫金蓮。心隨諸佛往生去。無去無來事宛然。於是具浴更衣。斷飲食。歛目危坐。十四日將午。面西念佛。安然而逝。送者麁至。祖忽開目曰。吾去卽來。生死事大。各自淨心念佛可矣。遂合掌連稱佛名而寂。世壽四十有九。僧臘二十有五。是冬臘月八日。奉靈骨塔於常熟拂水巖之西。後鄧山諸道俗懷祖道行。迎骨重建塔於阿育王寺之右。刻有省庵法師遺書一冊。略備始末。二撰文法師竟。

●三啓教因緣



良以法不孤起。起必有由。此文以何因緣而作。不可不知。細察因緣有二。一者總。二者別。總乃由省庵法師。本覺內熏爲因。熏起始覺之智。流出此篇文字。復由衆生外感爲緣。感動法師大悲。勸發菩提之心。○別則因緣具有十種。如本文備明。一。念佛重恩故。二。念父母恩故。三。念師長恩故。四。念施主恩故。五。念衆生恩故。六。念生死苦故。七。尊重己靈故。八。懺悔業障故。九。求生淨土故。十。爲念正法得久住故。十緣義理。在後詳釋。三啓教因緣竟。

●四藏乘所攝

已知此文。發起因緣。有總有別。未悉藏乘。何所攝屬。藏有聲聞藏。菩薩藏。聲聞藏。厭苦斷集。慕滅修道。但求自度。速出三界。○菩薩藏。解行雙圓。自他兩利。普度衆生。齊成佛道。此文開衆生之圓解。起萬行之圓修。應屬菩薩藏攝。

乘有小乘。大乘。乘字讀去聲。乘是車乘。從喻立名。小乘是羊車。鹿車。大乘是牛車。更有最上乘。是大白牛車。此典出自法華經譬喻品。有一長者。喻佛諸子幼稚。喻衆生入朽故大宅。喻三界嬉戲娛樂。其宅四面。倏然火起。喻煩惱火長者見火。速告諸子。此舍已燒。汝等宜速出來。勿爲大火之所燒害。諸子聞已。不知何者是火。何者爲舍。何爲焚燒。不知畏避。依然樂着嬉戲。長者知子本心各好珍玩之物。而以方便。誘令得出。告曰。汝等宜速出來。我有羊車。喻聲聞鹿車。喻緣覺牛車。喻菩薩可以相與。諸子聞已。願樂諸乘。爭相疾走而出。長者見子出已。其心大快。自惟財富無量。具足無量功德財等與大白牛車。等賜最上一佛乘此捨三乘歸一乘也。○小乘。談理狹隘。但說人空。不明法空。又但求己利。不肯利他。○大乘。談理深廣。徹法底源。又明一切衆生。皆當作佛。此文勸發菩提心。勸修菩薩行。求成佛道。應屬大乘所攝。四藏乘攝屬竟。

●五教理淺深

已知此文。菩薩藏大乘所攝。未悉於賢首五教。當收何教。五教者。一小教。但明人空。不說法空。但求自利。不肯利生。卽台宗藏教。貪著小乘。三藏學者。但證我空之理。但了分段生死。

二始教。始者初也。卽大乘初門。故名爲始。此教有空宗相宗二種。若約但明諸法皆空義。爲空宗卽台宗通教。當體卽空。不待滅色而後空。一切身

心世界。猶如空華鏡像。卽色卽空也。○若約廣談諸法差別義。爲相宗無明不覺生三細。境界爲緣長六麤。多談法相。少說法性。有成佛不成佛。亦名分教。若約從眞起妄。則有六凡依正因果。返妄歸眞。則有四聖依正因果。卽台宗別教。十界具足。差別不同也。

三終教。說如來藏緣起正理。如來藏隨緣。成一切法。俗諦緣起無性。眞諦

一切皆如。中諦一切衆生。皆當作佛。方盡大乘至極之理。故名爲終。○亦

名實教。多說法性。少說法相。縱說法相。亦會相歸性。以稱合實理而說。故名爲實。此教真俗二諦圓融。卽台宗圓教雙照義。

四頓教。不依地位漸次。亦不說法相。唯辨真性。絕相泯心。一念不生。卽名爲佛。頓超佛地。不歷三祇。故名爲頓。此教離一切相。卽台宗圓教雙遮義。五圓教。總一法界。性海圓融。緣起無礙。身毛塵刹。互相卽入。於一毛端現寶王刹。坐微塵裏。轉大法輪。故名爲圓。此卽台宗圓教。遮照同時義。

此文勸發菩提心。令發成佛之因心。而得究竟之果覺。佛種從緣起。正屬賢首終教。文中勸人。去偏取圓。兼屬圓教。五教理淺深竟。

●六宗趣分別

已知此文。教理甚深。未悉何爲宗趣。賢首云。當部所崇曰宗。宗之所歸曰趣。宗卽是因。趣卽是果。以本文而明宗趣。當以發菩提心爲宗。證菩提果爲趣。六宗趣分別竟。

●七能詮教體

已知此文。宗趣圓極。未悉何爲教體。教體者。教法所依之體也。娑婆世界。衆生耳根偏利。故諸佛諸祖。皆以音聲而作佛事。楞嚴經云。此方真教體。清淨在音聞。是以音聲爲教體。

若徒有音聲。而無名句文。如風聲水聲。豈能詮理。如是則當以聲名句文。四法爲教體。○又但有能詮之四法。而無所詮之義理。如山歌野曲。豈能爲教體。如是則當併攝所詮爲教體。○又若文若義。皆不離心。心爲諸法之本。諸法不出一心。此文字字句句。都從省庵法師。性海中流出。既有文字。則屬事相。依終教教理。自當會相歸性。而以歸性爲教體也。七能詮教體竟。

●八所被機宜

已知此文。能詮教體。未悉所被何機。文是省庵法師。化導之教。若聞教生

信發解。依教起修。求證。皆謂之機。教必對機而成益。如藥必對症而生效。此文勸發菩提心。乃屬大乘之教。理行果。應被大根衆生。根機既大。智慧必大。心量亦大。於此大教。方能領荷。願力亦大。於此家業。方克承當。大根衆生。正所被之機也。○如是則應小根絕分。如云龍象蹴踏。非驢所堪。若仔細研究。二乘根器。亦爲當被之機。何以故。因二乘志意狹劣。但求獨善其身。不肯成就衆生。經此文種種勸導。恥小慕大之心。自然而生。時至機熟。必能回小向大。而發菩提心也。故此文實可普被三根。八所被機宜竟。

●九力用殊勝。

菩提心。爲諸心中王。具殊勝之力用。能荷擔衆生。及荷擔阿耨多羅三藐三菩提。若發此心。可以上求佛道。可以下度衆生。具足四弘誓願。此心有如是之功能。力用。然此心力。由此文勸發而生。此文由省庵法師菩提心海流出。故此文有殊勝之力用也。九力用殊勝竟。



●十別解文義○將本文全篇仿照諸經分爲二分。

甲 一序分。自開篇至方得名爲真正發菩提心也止。

二正宗分。自此菩提心諸善中王至是爲發菩提心第十因緣也止。

三流通分。自十緣備識至文終。

今初序文。敘述發起之意。文分爲二。乙 一先敘修行心願爲本。二敘發心

去取須明。今一

不肖愚下凡夫。僧實賢。泣血稽顙。哀告現前大衆。及當世

淨信男女等。唯願慈悲。少加聽察。

首句自謙之詞。不肖表其非賢。愚下謂非上智。凡夫愧非聖人。因對涅槃法會衆前說話。未敢自高。衆中僧俗老幼。根機不等。或有諸佛菩薩影響。當時或有祖師聖僧。乘願再來。肉眼不識。故發言必宜謙遜也。

僧實賢。梵語僧伽。簡稱僧。譯云。和合衆。乃出家脩行者之通稱。和合有二。一理和。謂十方聚會。個個學無爲。同證無爲之理也。二事和。有六。身和。同住。口和無淨。意和同悅。戒和同修。見和同解。利和同均。出家人。故稱六和僧。○實賢法師之法諱。字思齊。其師爲取如是名字。意望見賢思齊。法師出家後。參學具足。宗教兼通。解行相應。智慧雙運。發大乘願。行菩薩道。歸心淨土。臨終往生。上品上生。實預聖賢之列。誠不負師之所望也。

泣血稽顙。哀告現前大衆。及當世淨信男女等。此同體大悲之所感發。懇切告衆也。念一切衆生。與佛本來同體。何以諸佛已成正覺。我等尚在沉淪。由是熏動大悲心。不覺悲傷涕泣。血淚交流。稽顙卽禮拜也。以頭稽留於地。以表誠懇恭敬。較常不輕菩薩。逢人禮拜受記。更有甚焉。

告而曰。哀者。悲哀發言。冀以感動衆心。現前大衆。謂非過去未來。乃現前涅槃會上之大衆。○及當世。及者。併及當世有二釋。一當今之世。由此會